

孔尚任诗文集

(第二册)

第二冊



孔尚任詩文集

中華書局

孔尚任詩文集卷四

詩（《長留集》）

五言古詩

馬右伊來都相聚日久臨別賦贈

汝來京華遊，作詩求其匹；掉臂公卿間，無人但捫蝨。念我時登堂，舊好堅如漆。冷暑發秋光，黃花雜丹實，列坐羅壺漿，竭量爲飲畢。論古入細微，垂簾語最密。恕我懶着冠，去來日不一。豈堪袂再分，聞之意若失！馬肩已駕車，寒風吹瑟瑟。莫歎敝貂裘，向南多陽日。

宗定九遠貽詩札賦答

頃讀東原札，狂喜忘晨粥。河橋別三年，情在故人腹。邊風草發涼，張燈坐旅屋。思君不得聞，舊景宛觸目。梅西新堂成，爽豁透林木。躬耕還著書，江岸歇黃犢。佳句日渾高，菊開況酒熟。應憐東華人，振衣塵滿掬。

題陳健夫小隱圖龔半千畫

結廬向茲山，不與人境近。嵐深草木密，榮枯記天運。時有樵夫還，更無漁人問。與世久相遺，學易始發憤。耕織自有偕，飲啄亦有分。從此樂百齡，可以稱小隱。慎勿慕周顒，翻然事州郡。

聞聊園族叔在濟南郡學考律定樂

吾魯周宗邦，金石多重器。祖庭復巍然，遺法垂經紀。樂正統羣工，瞽師授瞽弟。六代肆夏全，奕世罔廢墜。予立兩懸間，旦夕考古制。累黍定黃鐘，八音固餘事。合樂甲子年，至尊踐其位，不異漢元和，萬國來輯瑞。叔也備官師，時雨隨所至，聽樂悟心聲，手口兼六藝。從者數百人，咸令解妙義。洋洋大韶音，今復興齊地。應有驅車翁^①，聞樂忘肉味。

①「翁」闕里孔氏詩鈔作「者」。

王阮亭先生過訪寓齋

積雨地皮青，重門垂蘿蔦。終朝科白頭，熱客顧我少。司農喝道來，不嫌屋低小。褰帷抽架書，展讀意縹緲。畫軸爲橫陳，鑒別出物表。太守具威儀，丈人杖荷蓐。折節與獨行，馬牛風不擾。朝野隱奚殊，此事今誰曉？

甲戌正月答仙裳先生寄懷原韻

坐破舊青氈，鮮利亦寡害。下士隱金門，言行不足載。浮沉忽十年，母老兒皆大。雞鳴入紅塵，僕僕夜匪懈。道逢臺省人，昔爲予流輩。笑予役淮南，囊詩無人採。雨雪壞征衣，精衛虛填海。還朝帝德寬，能容狂奴態。彈鋏燕市中，獨歌不逐吠。春風吹白髭，餘寒猶病肺。努力謀晨炊，室無物堪賣！何以慰高堂，婉辭笑相對。茲境惟君知，相思不得會。忽接紈扇詩，使我心目快。論交氣須真，端不爲文采。一讀再朗吟，纏綿而溫藹。俗腸羶酪多，今始飲甘澀。不願黃河清，但願仙翁在。時時寄新篇，壇坫賴不廢。吾將拂袖歸，期翁同登岱！

送丁勗庵南還

君本野鶴姿，入洛稱文伯。相逢殘臘時，茅檐雪欲下。寒手不炙爐，抽我蠹魚架。積書如積金，願爲無者借。選樓已屬君，應劉難方駕。且莫歌歸歎，待看紙增價！春煥忽春寒，春服不能量。老于燕山客，鬱鬱作病狀。聞君束南裝，披衣還惆悵！話別須醇醪，百錢不在杖。曉雨落花時，馬行惜錦障。空手贈一言，奚囊安足放？

盆桃盛開留梅耦長、顧天石小飲步耦長韻

密友同巷居，尋我雨後天。適逢久別者，握手情益堅。寸心不易說，春困忘午眠。或傾杯中物，或鼓膝上絃。盆桃如解意，一枝紅欲然。好花值良會，真比他時妍。

禿梅

禿梅晚着花，落落三數點。誰剪橫水枝，樵斧響岩厂。移來歷冬春，精神猶寒儉。新苞附老柯，照屏清影斂。吹拂勞春風，微紅暈若染。隱几夢溪橋，酒醒香在簾。對之披素書，布簾十日掩。

送黃稚曾之繁昌

秋雨沐西山，曉霽百蟲醒。驛路城郭西，林長人易迴。白髮觸紅塵，不飲情醅酹。披衣起送君，涼風吹巔頂。長安似槐安，冠裳與蟻等。董賈復誰知，何處無束脞？快哉君茲行，硯席接田町。鄉月照談經，詠歸在漁艇。回望郭隗臺，雪深烟已冥。

和林桐叔歸石嶽詩

君返京洛車，飄如雲歸嶠。奇絕石嶽詩，境與精神肖。土肥稼初登，原闊早秋眺。水村添碓舂，山市漸糴糶。密榛路忽通，斧聲及峯峭。疏導東澗泉，遠來就罾釣。百家宿籬旁，曉昏林異照。有嵐地皆靈，無花景亦妙。于茲營草堂，領略得樞要。高鳳樂讀書，焦光苦辭詔。古人踪易追，時局老難料！吾闢有石門，與君頗同調。登岱遙相期，過嶺終踐約。雞肋何足貪，儒冠將棄溺。往來採藥人，寄函發一笑。

瀚海石

秋風吹榆關，浮雲自北霽。捷書日三馳，盈廷頌聖帝。有客負弩歸，明駝行何滯？駝背爛見肌，狼藉裹氊毳。家人慶生還，喜極方揮涕！解刀脫襦襜，革囊半就敵。纍纍攜莫前，人疑獲軟細。傾囊五色光，繁星照襟袂。錯落琅玕珠，木難間火齊；綠者綴兒纓，紅者點女髻，可以飾金釵，鈿珥付雕製。頓解深閨愁，不問擒賊計。家家賽瓊瑤，市僧恣品第。翻羨沙磧中，勝我五都麗。秦漢事邊功，無乃爲此繫？人棄者我存，時時拂巾悅。聊以當豐碑，用紀北征歲。

同人飲李蒼存寓

役役塵中客，襟懷頗能開。巾車亭午出，多就故人盃。南鄰有宿約，籬菊秋復栽。張幕茅簷下，薄霜未爲災。佳卉修晚節，君子願徘徊！濁醪不易得，旅貧誰則哀？釀錢入君室，素心無嫌猜。既醉還善謔，頭白心仍孩。金門容方朔，奚爲歸去來？

車蓋被偷覓之旋獲志感

早起命巾車，來趨良宴會。乘車復食魚，無乃傷侈汰？據座方高談，偷者已伺外。尺布奚足縫，施技斷其帶。免脫人莫知，一車如蟬蛻。諸僕色倉皇，予意獨康泰。卽呼往偵之，旋手獲市僧。輾轉

易百錢，所求皆不大。傷哉儒流貧，儒下猶有丐！失去忽復來，得失且莫慨。仰面看青天，浮雲如車蓋。

送李永淇兄弟南旋

留君緩束裝，君情向予告：三雁飛成行，倚閭傷懷抱。促君早束裝，門外天涯道。設酒不成歡，張琴不成操。四月麥秀齊，黃雀野田噪。南北車馬塵，紛來撲席帽。隘路從人爭，旅餐與弟勞。吟詩記客程，宛溪容易到。舊書未移牀，荒徑童已掃。不願君出田，願君詩入奧！金門故人多，憶我須偏報！

岸堂消夏聽樊花坡絃索蔣玉淵、潘層峯、顧天石、李丹崖適至留飲

雞鳴入紅塵，歸寓寢當晝。煩熱夢難清，無病體亦瘦。幸少雜賓過，闢地爲小囿。綠蘿任拂頭，黃蝶敢落袖。丹實垂纍纍，繁英皆可嗅。清簾與疏簾，誰云吾室陋？況有絕技人，絲竹漸以奏。當歎憶同心，剝啄門已扣。命剪畦中蔬，兼摘籬上豆。形忘壺自斟，情親言不謬。科頭脫屐裙，四窗風易透。慷慨論心時，豁然見宇宙。眼前冠蓋交，未若嵇阮舊。攜手步苔階，晚涼如秋候。欲別醉復醒，倒尊何妨又？

長安晚秋懷劉在園太守

命車何所遊？衣薄寒初忍。旅屋絡緯鳴，暮城砧已緊。九衢試輕裘，領爲故人引。孤鶴無豐毛，健犢在短鞫。霜露有代乘，思多力已窘。仰聽西風高，繁籥靜候隕。飲酒飾朱顏，少艾休相哂！人生非西山，青蒼會有盡。

詠天竹

窗草根已除，冰雪積階縫。異卉挺叢枝，纍纍朱實重。火齊曜百琲，赤瑛貫五綜。節惟君子知，豆宜美人種。縹緲天半霞，丹桂屬羣從。飢鳳無雜吞，對之充朝饔。梁肉飫侯家，笑茲荒衙倖。豈知天竹名，不入淇澳誦。粒松子並垂，蠟梅根同壅。畫入歲寒圖，世外三友共。

過東皋草堂同龐雪崖、葉季良分賦

草樹蓊然深，東皋翳其內。出郭爽氣侵，停車解塵佩。流潦變陵谷，舊路已茫昧。禽蝶迎秋暉，士女度晚靄。望茲草堂新，知有幽人在。樂志寄釣耕，養疴吸沆瀣。僻地絕雜交，古處召我輩。素剖深溪鱗，青摘老圃菜。一飽無餘營，痛飲慷以慨！臨風墟墓多，榛荒雲巖巖。節序驚羣情，悲歡同大塊。攬衣上平岡，千山連絕塞。王霸失姓名，觴詠傳異代。物理固可齊，人生壯不再。急命管與絲，陶我胸中礙！

送袁杜少太史還山

曉起見微霜，秋菊亦已采。顧我同心人，歸裝不我待。匆匆巾柴車，長揖謝寮案。束裹組與簪，一囊雜蘭茝。前路草樹深，岫雲出靄靄。客髯白于雲，長笑掀滄海。松楸鬱在望，故廬未遷改。還校石渠書，出處各千載。漆水抱廬來，釣磯悠然在。他日訪隱淪，十里聞欸乃。

送楊耐庵還襄陽

遙憶武昌魚，腹鱗白如雪。夜夢作此郡，買魚駐行節。君自襄陽來，漢水通曲折。應誇漢水清，不似燕塵熱。歸心飄如烟，歸馬何蹀躞？送君復送君，菊開社燕絕。朝上蘆溝橋，掩淚不能說。橋上送行人，湮沒幾賢哲。不信峴山頭，尚有羊公碣。

五日祭窮

俗謂破五祭窮鬼于廁

俗傳巫師言：五破百不好，但宜啜菜根，閉門自滌掃。渣穢實破箕，昏時薦窮媼。窮媼者窮魁，衣敝容枯槁。司倉倉如懸，司篋篋如倒。以之司廁牕，能與豕爭飽。才德各有宜，委之胡不早？延置破箕中，設祭莫草草。零楮與斷香，糕飯雜栗棗。三酹殘酒漿，命僕跪致禱：不腆主人詞，幸勿生懊惱！廁爲爾華堂，糞爲爾梁稻，主富爾不飢，年年祝壽考！

新寒試爐

侵晨過御河，水面結微皺。蓬鬚迎北風，寒逼朝衫袖。家遠授衣遲，況吾衰且瘦。難與輕肥人，朝市爭先後。歸來買薄醪，招我論文舊。布幔深下簾，繭紙密覆牖。乍撥竹爐灰，楷杷紅已透。一室留春溫，眨眼堅冰候。爐旁纔醉眠，莫遣花開驟。

上已招同人集草橋

曉起春鳥鳴，百物懽新霽。檢曆得良辰，約我舊時契。與人請所之？城南事修禊。萬柳發濃青，曲流清以細。芳草雜幽花，柔美勝毯罽。羣賢聯輿來，樹影互掩蔽。相見誇景光，微陰宜涼袂。泥瓶封已開，行觴亂次第。斂容多苦思，四座罷談藝。偶爾握蘭薰，便爲千古計。役役據鞍人，招之亦不憩。

贈吳名翰

生無知心交，明珠空照乘；歿無百世名，黃金何足剩！岐路遇吳生，頭顱爲我贈。人有幾頭顱，言發一時興。吳生肝膈言，我以肝膈聽。猛虎豈不威？聞者力能勝。吾儒非孟賁，志由讀書定。直道當千夫，無謀笑百佞。秉燭春夜長，熱酒貯滿甕。飲酒莫言心，心非言可罄。

贈萬季野

茵蔯初折風，桃花曉露逼。清流泛紅霞，難比仙人色；欲求駐顏方，毛孔塵難拭。藥物在何山？俗

眼未一識。拜問商大夫：所閱幾荆棘？豐頰若乳嬰，必借大丹力！舉掌拍我肩，負屈莫留臆，大丹亦易成，行吟須早息！抑鬱傷氣神，不啻金火尅。吾讀古史多，榮辱殆千億。

贈吳鏡菴

我與公子遊，公子已乞食，憔悴離淮南，背曲膝無力。揖我客堂中，炯炯目重拭。布幔掩風塵，燈下兩相識。借酒細論文，文中有胸臆；真文不媚時，甘受人彈弋。飢來叩誰門，斟酌看顏色。親戚非素心，留之亦不息。使酒罵庸奴，未嘗傷酒德。燕市筑屠中，往往埋皋稷。高軒赫奕來，遙將褐衣逼；高軒馳街中，褐衣避巷側。窮通定賢愚，萬古天默默。

別李彥繩

種樹歲月深，移根必附土。結友骨肉成，生離增痛苦。相逢無一言，隱憂在肺腑。別酒買中山，別賦歌南浦。顧我還鄉衣，捉肘何藍縷！手欲解綈袍，恐非章身黼，文彩在篋中，傾倒爲我取。霞帔雲錦裳，榮及小人母。還家萱草開，服之宴端午。筵上炫綺羅，牆頭驚鄰姆。無官雖長貧，有友終不窶。海闊可測量，山高可步武。委曲百端情，十指莫能數。

贈胡智修大參

住世已如山，歸山與世絕。人稀草木長，心跡不復說。冷冷澗中泉，爲我洗煩熱；謾謾松間風，爲我拂塵屑。安得故人車？去尋高蹈轍！孤雲不同遊，舒卷意難決。酌酒入肺肝，吟詩出喉舌。可憐促膝歡，明日千里別！筆硯對君焚，膏沐爲誰悅？入山採名香，蘭根雜桂節。清夜思君時，起將一瓣爇。

贈常生

風搖酒肆燈，俠客塵初澡。垂涎易州春，無錢付傭保。登樓但呼茶，白醉亦傾倒。有耳不速聾，時事聞人道。恨無袖中椎，擊碎自頭腦。睡醒酒壚旁，尋我來何早？商量一寸心，恩讐非草草。快事多因循，荆高年已老。

示王古修

亭亭桐枝枯，翩翩鳳羽鏤。岸堂一尺階，尙有君子拜。君子非軒車，被服縕袍敗。隋珠裏絮中，時時露光怪。縱談學劍時，大言人難解。天廡無驩騶，英雄是奴价。慟哭走桑乾，狂疾遂不瘥。古狂庸何傷，詩體自高邁。不爲禮法拘，其術亦狡獪。傷哉罹禍人！膽小乃如芥。

讀溫臨翼遊西山詩有感

西山氣絕佳，十年與目射。每讀紀遊篇，欲請休沐假。今獲賦遂初，翻成俗士駕。乞食叩朱門，愧

汗病千夏。遙望翠芙蓉，苦憶舊山舍。作序送我還，未肯移文罵。乃知同道朋，偏愛意難化。君文亦已傳，我官何妨罷。有風掃浮雲，明月當長夜。

僧根潔來訪攜玉池生新選寒瘦集見貽

久別玉池生，相思無明晦。欲脂歸山車，踟躕心瑣碎。敲門惠遠來，詩卷探懷內。如見操觚人，冷眼遙相對。選句如琢冰，稜骨絕藻績。寒瘦是何詩，猶能撐大塊。飽食養拙腸，曝熱習曲背。天然松際風，冷冷吹我輩。捉肩叉手吟，郊島同一類。獲此白雲篇，不與紅塵賽；紅塵有消時，白雲長在佩。

別余鴻客

朝向黃金臺，暮傾燕市酒。久官餘空囊，餓散聯床友。慷慨然諾心，十已負八九。交君如漆膠，組解難分手。堂空白日閒，心事閉于口。屈賈前代賢，少可多所否。不令去國人，言詩失溫厚。益友良足惜，何妨沮溺友！悵悵指東山，吾有垂白母。

東皋席散同金素公冒雨宿茶庵卽事

東皋飽飫餘，摩腹看晴渡。微雲起前溪，漸沸近遠樹。雨氣帶草香，檐際紛來注。白紵慙新涼，正

宜話情懷。暝色濃于雲，催我歸城路。松逕別主人，崖滑苔澆袴。水盪車轍迷，泥深履底鉤。人跡斷晚村，隔林答友呼。輿夫智力窮，惴惴防傾仆。昏黑過閭隄，淋急濤益怒。行行聞犬聲，壁罅燈光吐。茶榜記雪菴，入門夢始寤。乞火炙中衣，衝風背赤露。豎兒贈村醪，慰藉如眷屬。風雨撼郊原，挑燈成快聚。酒醉語已闌，欲臥踟躕顧。寒帷仍登車，憑軾疑行路。茶案短于身，素公施枕鋪。衣涼憶衾稠，縮腳覆雨具。長吁嘆所遭，苦樂分旦暮。勝遊不足欣，險途何須怖，暫憩竹屋中，此時少有趣。

張敬止中丞招飲日涉園之斗室醉後觀多福硯爲張東華先生故物感

其天合之奇賦以識之

斗室溫如春，臘酒排拇戰。卒歲無褐人，翻憶蒲葵扇。解醒索葛花，鎮熱得石片。主人鄭重言：石名多福硯。請觀母蝠形，張翅筋脉見；小蝠附乳稠，蝠蝠形略變。何年風雨飛，出海成石燕。張家兩中丞，得失車輪轉。一硯供二賢，先後荷殊眷。釐祝非巫辭，確信天與善。予侍平州顏，恍覩華東面。前身傳後身，硯比唐虞禪。奇合百年珍，一日摩挲徧。予雖鑒古多，驚此雙眸眩。愛玩酒力消，請君重張宴！

伏日同吳鏡菴、王古修、金青子食冷淘

炎風撲鬢來，欠伸客困午。揮汗頻驅蠅，濁如嬰思乳。煮泉難沃喉，餐冰慮腸肚。乃有解意僮，旋充竈下姥。摒擋不聞聲，抽麵細成縷。滿盂滑流匙，雪濤注秋雨。槐葉何須調，辛盤佐醯醢。不礙老齒牙，能清熱肺腑。或呼七盃空，或報盞竭五，舉案手不停，吞牛氣相賂。傾刻涼生胸，膨脹腹皆鼓。大笑謝羣賢，草具幸勿吐。消暑兼療飢，冷淘名最古。

紫玻璃盞

燭奴一尺光，瓊筵五彩兢。激灑掌中盃，紫燄吐不定。嫩苞葵錦開，滿朶茄花盛。荷囊未撮邊，蓮炬欲燒柄。丹砂煉最深，胭脂揩不淨。色染相公袍，影艷美人鏡。荔枝泛酒鮮，葡萄入唇硬。晃耀目難窺，比擬語已竟。貨來南海蠻，製自西方聖。天體玻璃成，霞光日月映。小盞何足奇，乾坤理可證。

新秋過陳心簡僧寓張曉岩、汪半亭、許公銓、徐滄綸同集分韻

官罷故人稀，茅簷但負手。僻性惡市塵，但看僮縛帚。忽憶僧寮幽，籃輿就良友。秋泉洗玉盤，雪釀傾瓷斗。盡屏郇公廚，鮮潔烹畦韭。一斟復一酌，鮑徐吟在口。日落山雨來，晚涼度槐柳。暫教耳目清，那知襟露肘。四座軒冕人，視同沮溺友。三載避華筵，茲會吾豈苟。

路遇黃松壑之太守任

涿鹿十丈塵，舊是迷人霧。戴笠與乘車，咫尺誰相顧！君出我歸田，黃葉撲官路。南北馬牛風，此處成一晤。萬乘自東來，驛檄飛如羽。道旁立斯須，寸心不及吐。

石門橋仲子祠

晨門魯國賢，載之高士傳。爲魯守石門，遺跡在魯甸。山幽林壑佳，隱者恣游衍。茲境大道旁，風揚塵一片。曠野斥鹵鄉，高士奚所戀？孔氏家於鄆，子路家于卞，負笈往來頻，石門息其倦，細繹問答辭，乃是鄉鄰諺。一夕成千秋，芳躅天下羨。燕趙借佳名，立祠設時薦。故山茅屋中，秋燈照宿燕。

拜萬章墓

回望嶂崢嶸，容我兩夜住。霜晨別孤桐，迢迢下石路。車碾栢子香，馬嘶白楊樹。樹下讀殘碑，乃拜萬章墓。章舌若儀秦，不爲戰國附。甘心仁義師，能言楊墨懼。不有問難辭，應無七篇註。孟功配禹功，王素臣亦素。生平負笈遊，何年掩草露！鄒郭鬱在望，山川勢迴互。無酒酌蒼苔，夕陽恣瞻顧。

將之平陽別霍署同客親族